

16. april 2015

Inuiaqatigiit kissaataat tunngavigalugit nunap ilaani aatsitassarsiorfissanik inerisaaviususanik pilersitsinissaq aammalu nunap ilaani allani avatangiisit, ilorrisimaarneq, inuussutissarsiutit pioreersut assigisaalluunniit tunngavigalugit aatsitassarsiorfigineqarusunngitsunik pilersitsinissaq pillugu oqallisissiamik saqqummiusseqqullugit Naalakkersuisut pequneqarnissaanik Inatsisartut aalajangiiffigisassaattut siunnersuut. Oqallisissiaq innuttaasunik, soqutigisaqatigiinnik aalajangiisartunillu peqataatitsinikkut amerlasuunit akuuffigineqartumik oqallinnissamut toqqammaviussaaq. Oqallisissiaq 2016-imi upernaakkut ataatsimiinnissaq nallertinnagu naammassineqareersimassaaq.

(Inuit Ataqtigiit Inatsisartunut ilaasortaataat)

Nunatsinni aatsitassanik piiannerit atuinerillu nunatsinnut inuinnillu aningaasarsiornikkut iluaqutaanerpaasunngorlugit ingerlanneqartassapput.

Siumut isumaqarpoq aatsitassanut inatsik pitsaasumik patajaatsumillu inissisimasoq, aammalu tamassuma taamaaginnarnissaanut sulinerup ingerlanneqarnera toqqissisimanartuusoq.

Taamatuttaaq Naalakkersuisut Kalaallit Nunaata uuliasiornermut aatsitassar-siornermullu 2014-2018-imut periusissiaanut 2014-imi akuersissutigineqartup ingerlatiinnar-nissaanik siunertaqarnera, avammut kiinnernermut kusanartuusutut isigaa. Unalu siunnersuut Kalaallit Nunaata uuliasiornermut aatsitassarsiornermullu 2014-2018-imut periusissiaanut akersuuttutut inissisimammat politikikkut sangujoraalersitsisinnaasutut Siumup isigaa.

Siunnersuut siuliani assinganik qaqqinneqarnermini Siumumit itigartinneqareerpoq, aammalu siullermik qaqqinneqarnermini (2014) amerlanerussuteqartunit aappassaaneerqarnermini siunnersuut taama isikkoqarluni itigartinneqarsimalluni.

Ullumikkut inatsit taama isikkoqarluni Inuiaqatigiinnut, peqqissuttimut aammalu uumasooqasuttimut illersuinngittutut Siumup apeqquersimangilaa, taakkuninngali illersuisutut isigaa.



Tassami Aatsitassarsiorluni ingerlatat avatangiisitigut isumannaatsumik ingerlanneqassasut ullumikkut piumasqaataareerpoq, taamallu Avatangiisinut sunniutaasussanik nalilersuisarneq aammalu inuiaqatigiinni piujuartussamik iluaqutaasumik sunniutaasussanik nalilersuinerit suliarineqartaramik.

Angisuunik eqqarsaneq pingaaruteqarpoq. Tassami aallaqqaasiininni inuiaqatigiit anginerpaamik ajunnginnerpaamillu iluaquserneqarnissaat tassani pivara. Angisuunik eqqarsarnermi aatsitassarsiorfeqqat aammalu pinnerasaasiassanik katersisartut illersorneqarnissaat Siumut erseqqissumik pingaartippaa. Siumup pingaartippaa sapinngisaq tamaat pinnerasaasiassat nunaqavissunut iluaqutigineqarnissaat.

Naggataatigut Siumumit oqariartuutigissavarput suli Nunarput aatsitassarsiorfissuannunggimmat tulluuttuosorinnginnatsigu aatsitassarsiorfiusinnaasunik ataasiakkaanik mattussuilereernissaq, tassami immikkoortiterinani nunaminertanik misissuiffiusinnaasunik tunioraasarnissaq Siumup politikkeraa.

Siumumit siunnersuut taama isikkoqartillugu itigartipparput.

Ineqi Kielsen
Siumut